

欽定吏部處分則例卷之四十九

禁獄

查勘監獄

一各處監獄俱分建內外兩處強盜并斬絞重犯俱禁
內監軍流以下俱禁外監再另置一室以禁女犯凡
州縣官到任之初即將監獄查勘如係堅固完好造
具文冊申送上司存案儻有廢壞立即修理該管府
州道員於盤查時順便往驗若廢壞不修至新舊交
代之時決同捏飾具報將舊任官降一級調用新任

官降一級留任俱私罪府州不行揭察罰俸一年道員

罰俸六個月俱公罪

一監獄重地管獄有獄官宜不時巡察看視如不行親

查以致牆壁傾圯吏卒疎怠雖無越獄情事亦將管

獄官降一級調用有獄官罰俸一年俱公罪

一凡應禁人犯一切鋪監使費永行革除如禁卒人等

有藉端需索凌虐情事將失察之管獄有獄官照失

察書役犯賊例議處例載書役門知情故縱者照縱役犯

賊例革職私罪